

Na osnovu člana 18. stav (1) tačka m) i člana 19. Ustava Kantona Sarajevo („Službene novine Kantona Sarajevo“, broj: 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo na _____sjednici održanoj _____2024. godine, donijela je

PRIJEDLOG

**ODLUKU
O IZMJENAMA I DOPUNAMA POSLOVNIKA
SKUPŠTINE KANTONA SARAJEVO**

Član 1.

U Poslovniku Skupštine Kantona Sarajevo („Službene novine Kantona Sarajevo“, broj 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22-Ispravka), član 24. stav 4. mijenja se i glasi:

“Ukoliko bilo koje radno tijelo ne dostavi Skupštini izvještaj o pitanjima iz svoje nadležnosti koja su na dnevnom redu, do dana određenog za zasjedanje Skupštine, smatra se da nema primjedbi na predloženi materijal.”

Član 2.

U članu 64. u stavu 2. iza riječi “radne,” dodaje se riječ: “hitne,”.

Član 3.

Član 65., mijenja se i glasi:

“Izuzetno, u hitnim slučajevima, predsjedavajući Skupštine može da sazove sjednicu u kraćim rokovima od onih predviđenih Poslovnikom, a dnevni red za ovu sjednicu predlaže se na samoj sjednici, koja je hitnog karaktera.”

Član 4.

U članu 71. stav 1., mijenja se i glasi:

“Poziv za sjednice Skupštine sa prijedlogom dnevnog reda i materijalima upućuje se poslanicima/zastupnicima, Vladi i ostalim učesnicima, elektronskim putem, najmanje 8 dana prije dana određenog za održavanje sjednice.”

Stav 2., mijenja se i glasi:

“Sjednice radnih tijela Skupštine održavaju se prije početka održavanja zakazane sjednice Skupštine.”

Stav 6., mijenja se i glasi:

“Izuzetno, u hitnim slučajevima, predsjedavajući Skupštine može sazvati sjednicu i u roku kraćem od 8 dana, a dnevni red za ovu sjednicu predložiti i na samoj sjednici u kojem mogu biti samo one tačke dnevnog reda zbog kojih se hitno saziva sjednica. Konačnu odluku o utvrđivanju hitnog karaktera sjednice Skupštine donosi Kolegij Skupštine.”

Član 5.

Član 83., mijenja se i glasi:

"Nakon utvrđivanja kvoruma sjednice, predsjedavajući predlaže dnevni red i obavještava o eventualno pristiglim prijedlozima za izmjenama i dopunama dnevnog reda u skladu sa članom 73. Poslovnika i stavlja dnevni red na izglasavanje.

Po usvojenom dnevnom redu, Skupština glasanjem potvrđuje prihvatanje zapisnika sa prethodne sjednice.

Predsjedavajući vodi nastavak sjednice u skladu sa utvrđenim dnevnim redom sjednice i otvara pojedinačno tačku dnevnog reda na način da daje riječ predlagачu radi davanja uvodnih napomena koje ne mogu trajati duže od 10 minuta.

Nakon uvodnih napomena predlagачa predsjedavajući otvara raspravu.

Po utvrđenom kvorumu za rad sa početka sjednice, raspravljanje o pojedinim tačkama dnevnog reda sjednice se vrši bez obzira na broj prisutnih poslanika/zastupnika."

Član 6.

Član 86., mijenja se i glasi:

"Rasprava o pojedinim pitanjima dnevnog reda sjednice ograničena je, i to:

- za poslanika/zastupnika pojedinačno do 8 minuta;
- za predstavnika kluba poslanika/zastupnika do 10 minuta."

Član 7.

Član 87., briše se.

Član 8.

Član 89., mijenja se i glasi:

"Poslanik/zastupnik može zatražiti riječ da bi ispravio krivi navod i riječ dobija po završetku izlaganja govornika koji je izazvao krivi navod.

Poslanik/zastupnik je obavezan da se ograniči na onaj dio diskusije koji smatra krivim navodom i ne može dobijenu riječ iskoristiti za raspravu o drugim pitanjima. U slučaju da se poslanik udalji od ispravke krivog navoda, predsjedavajući mu odmah oduzima riječ.

Ispravka krivog navoda ne može trajati duže od dvije minute.

Poslanik/zastupnik može imati najviše jednu ispravku krivog navoda po jednoj tački dnevnog reda."

Član 9.

Član 90., mijenja se i glasi:

"Poslanik/zastupnik se može javiti da replicira na izlaganje prethodnog zastupnika i to samo jednom na pojedinačno izlaganje, po završetku izlaganja zastupnika koji je izazvao repliku, a ista može trajati najduže dvije minute.

Zastupnik kojem je replicirano, ima pravo dati odgovor na repliku u trajanju od jednu minutu.

U okviru jedne tačke dnevnog reda poslanik može imati najviše dvije replike.

Poslanik/zastupnik ne može replicirati na izlaganje predlagачa akta ili poslanika koji se javio da govori o povredi odredaba ovog Poslovnika ili za ispravku krivog navoda.

Poslanik/zastupnik ne može replicirati na repliku drugog poslanika/zastupnika niti na odgovor na repliku drugog poslanika/zastupnika."

Član 10.

Član 91., mijenja se i glasi:

"Poslaniku/zastupniku koji želi da govori o povredi Poslovnika, predsjedavajući daje riječ odmah. Poslanik koji dobije riječ u vezi poslovničke intervencije, obavezan je da precizno i konkretno navede odredbu Poslovnika za koju smatra da je prekršena i ne može poslovničku intervenciju koristiti za raspravu o drugim pitanjima. U slučaju da se poslanik udalji od poslovničke intervencije, predsjedavajući mu odmah oduzima riječ.

Izlaganje po prigovoru ne može trajati duže od dvije minute.

Poslije iznesenog prigovora predsjedavajući daje objašnjenje."

Član 11.

U članu 92., iza stava 3. dodaju se novi stavovi 4., 5. i 6., koji glase:

"Ukoliko zastupnik odbije da se udalji sa sjednice predsjedavajući može zatražiti asistenciju nadležnih službi ili organa radi udaljavanja zastupnika iz skupštinske sale."

"Ukoliko poslanik/zastupnik nastavi sa povredom reda na sjednici Skupštine, predsjedavajući Skupštine može prekinuti sjednicu do uspostave normalnih uslova za rad sjednice."

"Ostali učesnici u radu sjednice Skupštine, predstavnici medija javnog informisanja i građani koji prisustvuju sjednici, dužni su da se pridržavaju reda i da ne ometaju rad sjednice."

Član 12.

Član 93., mijenja se i glasi:

"Jednu pauzu tokom sjednice, do 15 minuta, odobrava predsjedavajući na zahtjev zastupničkog kluba, kluba naroda i Ostalih, ili 1/3 poslanika/zastupnika, bez izjašnjavanja Skupštine."

"Zahtjev za pauzu dužu od 15 minuta može biti odobren većinskom odlukom Skupštine."

"Sjednicu Skupštine može prekinuti predsjedavajući uz konsultaciju sa zamjenicima."

Član 13.

U članu 94., iza stava 1. dodaju se novi stavovi 2. i 3., koji glase:

"Izjašnjavanje o svim tačkama dnevnog reda se obavlja na kraju sjednice, osim u slučaju prethodnih pitanja."

"Izuzetno, na prijedlog predsjedavajućeg, Skupština može odlučiti da se izjasni o tački dnevnog reda nakon što se iscrpi rasprava o toj tački dnevnog reda."

Član 14.

U članu 115., iza stava 2. dodaje se novi stav 3., koji glasi:

„Izlaganje gosta na sjednicama Skupštine ne može trajati duže od 5 minuta."

Član 15.

U članu 137. stav 1., mijenja se i glasi:

"Nacrt zakona pretresa se na sjednici Skupštine po isteku roka od 8 dana od dana dostavljanja poslanicima."

Član 16.

Član 147., mijenja se i glasi:

“Predsjedavajući Skupštine po prijemu dostavlja prijedlog zakona poslanicima/zastupnicima i on se može pretresati na sjednici Skupštine po isteku roka od 8 dana od dana dostavljanja poslanicima/zastupnicima.”

Član 17.

U članu 152. stav 3., mijenja se i glasi:

“Amandman se podnosi predsjedavajućem Skupštine u roku koji ne može biti kraći od 4 dana od dana određenog za održavanje sjednice na kojoj će se pretresati prijedlog zakona.”

Stav 7., mijenja se i glasi:

“Predsjedavajući zaprimljene amandmane dostavlja predlagачu, koji je obavezan da se očituje u pisanoj formi i očitovanje dostavi predsjedavajućem prije početka sjednice na kojoj će se pretresati prijedlog zakona.”

Član 18.

U članu 158., iza stava 1. dodaje se novi stav 2., koji glasi:

“O prijedlogu za donošenje zakona po skraćenom postupku, odlučuje Skupština, kao o prethodnom pitanju na sjednici Skupštine prije utvrđivanja dnevnog reda.”

Dosadašnji stav 2., postaje stav 3.

Član 19.

U članu 194. stav 2., mijenja se i glasi:

“Prijedlozi iz prethodnog stava dostavljaju se u pismenoj formi i sa obrazloženjem predsjedavajućem Skupštine najmanje 8 dana prije održavanja sjednice na kojoj će se vršiti izbor, odnosno imenovanje.”

Član 20.

U članu 204. stav 1., mijenja se i glasi:

“Kandidat za mjesto premijera Kantona dostavlja predsjedavajućem Skupštine prijedlog kandidata za ministre i to najmanje 8 dana prije početka sjednice Skupštine na kojoj će se vršiti izbor.”

Član 21.

Član 212., mijenja se i glasi:

“Na svakoj redovnoj sjednici izdvojit će se sat vremena za poslanička/zastupnička pitanja i inicijative, na početku sjednice, kojem prisustvuju premijer, članovi Vlade ili ovlašteni predstavnici Vlade.

Jedan poslanik/zastupnik na jednoj redovnoj sjednici može postaviti najviše dva poslanička pitanja i pokrenuti jednu zastupničku inicijativu u vremenu do 3 minute.

Odgovori na poslanička pitanja mogu se davati usmeno ili pismeno.”

Član 22.

Član 213., mijenja se i glasi:

“Pokrenute zastupničke inicijative za koje se traži izjašnjenje Skupštine, dostavljaju se Kolegiju Skupštine u pisanoj formi, najkasnije 5 dana prije početka sjednice na kojoj se traži izjašnjenje o podnesenim inicijativama.

Ukoliko je o pokrenutim inicijativama potrebno prethodno očitovanje Vlade Kantona, Kolegij Skupštine iste odmah dostavlja Vladi, a razmatranje podnesene inicijative odgađa se za narednu sjednicu Kolegija, kako bi Vlada mogla da se očituje o pokrenutim inicijativama.

O uvrštavanju podnesenih zastupničkih inicijativa na dnevni red Skupštine, odlučuje Kolegij.

Član 23.

Član 217., briše se.

Član 24.

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

Broj: 01-04-
Sarajevo,

PREDSJEDAVAJUĆI
SKUPŠTINE KANTONA SARAJEVO
Elvedin Okerić

OBRAZLOŽENJE

I - PRAVNI OSNOV

Pravni osnov za donošenje Odluke o izmjenama i dopunama Poslovnika Skupštine Kantona Sarajevo, je član 18. stav (1) tačka m) i član 19. Ustava Kantona Sarajevo ("Službene novine Kantona Sarajevo", broj: 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13, 31/17), kojim je propisano da Skupština donosi Poslovnik većinom glasova poslanika/zastupnika.

II-RAZLOZI ZA DONOŠENJE

Zastupnici u Skupštini Kantona Sarajevo Elvedin Okerić, Jelena Pekić i Vibor Handžić, pripremili su prijedlog Odluke o izmjenama i dopunama Poslovnika Skupštine Kantona Sarajevo i isti dana 06.11.2024. godine uputili Kolegiju Skupštine, na nadležno postupanje.

Predložene izmjene Poslovnika Skupštine Kantona Sarajevo su u funkciji unapređenja rada Skupštine, otklanjanja potencijalnih opstrukcija u radu, ubrzanja i učinkovitosti rada Skupštine, jasnijim definisanjem određenih procedura, te skraćivanjem rokova za aktivnosti koje se odvijaju unutar Skupštine.

III-PRAVNA RJEŠENJA

Član 1. Ovim članom vrši se izmjena stava 4. člana 27. Poslovnika, u pogledu izvještaja koje dostavljaju radna tijela Skupštine.

Član 2. Ovim članom vrši se dopuna stava 2. u članu 64. na način da se dodaju i hitne sjednice.

Član 3. Ovim članom vrši se izmjena člana 65. Poslovnika, na način da se definiše sazivanje hitne sjednice.

Član 4. Ovim članom vrši se izmjena stavova 1., 2. i 6. u članu 71., na način da se mijenja rok za sazivanje sjednica Skupštine, radnih tijela Skupštine, kao i sazivanje hitne sjednice Skupštine.

Član 5. Ovim članom vrši se izmjena člana 83., koja se odnosi na jasnije definiranje samog toka sjednice, u smislu kvoruma, uvodnih napomena i rasprave.

Član 6. Ovim članom vrši se izmjena člana 86., koji propisuje vrijeme trajanje rasprave na sjednicama Skupštine.

Član 7. Ovim članom vrši se brisanje člana 87. Poslovnika.

Član 8. Ovim članom vrši se izmjena člana 89., koji propisuje ispravku krivog navoda.

Član 9. Ovim članom vrši se izmjena člana 90., koji propisuje repliku, njeno trajanje i broj istih.

Član 10. Ovim članom vrši se izmjena člana 91., koji propisuje povredu Poslovnika.

Član 11. Ovim članom vrši se dopuna člana 92., u pogledu povrede reda na sjednici.

Član 12. Ovim članom vrši se izmjena člana 93., koji propisuje odobravanje pauze na sjednici Skupštine.

Član 13. Ovim članom vrši se dopuna člana 94., koja se odnosi na izjašnjenje po tačkama dnevnog reda na sjednicama Skupštine.

Član 14. Ovim članom vrši se dopuna člana 115., koji propisuje trajanje izlaganja gosta na sjednicama Skupštine.

Član 15. Ovim članom vrši se izmjena stava 1. člana 137., u pogledu roka za pretres nacrtu zakona.

Član 16. Ovim članom vrši se izmjena člana 147., u pogledu roka za pretres prijedloga zakona.

Član 17. Ovim članom vrši se izmjena stavova 3. i 7. u članu 152., na način da se mijenja rok za dostavljanje amandmana i rok za očitovanje po istim.

Član 18. Ovim članom vrši se dopuna člana 158., koji propisuje da o prijedlogu za donošenje

zakona po skraćenom postupku, odlučuje Skupština, kao o prethodnom pitanju na sjednici Skupštine prije utvrđivanja dnevnog reda.

Član 19. Ovim članom vrši se izmjena stava 2. člana 194., u pogledu roka za održavanja sjednice na kojoj će se vršiti izbor, odnosno imenovanje.

Član 20. Ovim članom vrši se izmjena stava 1. člana 204., koji definira rok za dostavljanje prijedloga kandidata za ministre predsjedavajućem Skupštine.

Član 21. Ovim članom vrši se izmjena člana 212., koja se odnosi na poslanička zastupnička pitanja/inicijative u smislu preciziranja broja inicijativa koje se mogu pokrenuti na sjednicama Skupštine.

Član 22. Ovim članom vrši se izmjena člana 213., u pogledu definiranja procedure za podnošenje inicijativa za koje se traži izjašnjenje Skupštine.

Član 23. Ovim članom vrši se brisanje člana 217. Poslovnika.

Član 24. Ovim članom propisuje se da ova odluka stupa na snagu narednog dana od dana objavljivanja u „Službenim novinama Kantona Sarajevo“.

IV - FINANSIJSKA SREDSTVA

Za provođenje ove Odluke nisu potrebna dodatna finansijska sredstva.

Zastupnici u Skupštini Kantona Sarajevo
 Elvedin Okerić, predsjedavajući Skupštine
 Jelena Pekić, zamjenica predsjedavajućeg
 Vibor Handžić, zamjenik predsjedavajućeg

Bosna i Hercegovina
 Federacija Bosne i Hercegovine
KANTON SARAJEVO

PRIJLJENOC: 06-11-2024			
Organizaciona jedinica	Klasifikacioni broj	Redni broj	Broj priloga
01	04	244	9

KOLEGIJ SKUPŠTINE KANTONA SARAJEVO
 n/r članova Kolegija

PREDMET: Zahtjev za uvrštavanje prijedloga Odluke o izmjenama i dopunama Poslovnika Skupštine Kantona Sarajevo na dnevni red 17. radne sjednice Skupštine Kantona Sarajevo, dostavlja se

Poštovani članovi Kolegija Skupštine Kantona Sarajevo,

u prilogu zahtjeva dostavljamo Vam prijedlog Odluke o izmjenama i dopunama Poslovnika Skupštine Kantona Sarajevo, radi uvrštavanja iste na dnevni red 17. radne sjednice Skupštine Kantona Sarajevo.

Obrazloženje:

Na osnovu člana 72. Poslovnika Skupštine Kantona Sarajevo („Službene novine Kantona Sarajevo”, broj: 41/12 –Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22-Ispravka) predlažemo uvrštavanje prijedloga Odluke o izmjenama i dopunama Poslovnika Skupštine Kantona Sarajevo na dnevni red 17. Radne sjednice Skupštine Kantona Sarajevo.

Predložene izmjene Poslovnika Skupštine Kantona Sarajevo su u funkciji unapređenja rada Skupštine, otklanjanja potencijalnih opstrukcija u radu, ubrzanja i učinkovitosti rada Skupštine, jasnijim definisanjem određenih procedura, te skraćivanjem rokova za aktivnosti koje se odvijaju unutar Skupštine.

Podnositelji zahtjeva - zastupnici u Skupštini Kantona Sarajevo:

Okerić Elvedin, predsjedavajući Skupštine

Jelena Pekić, zamjenica predsjedavajućeg

Vibor Handžić, zamjenik predsjedavajućeg

Sarajevo, 06.11.2024. godine